

## Ujio wa Mfariji

Nami nitamwomba Baba, naye atawapa Msaidizi mwingine, ili akae nanyi hata milele; ndiye Roho wa kweli; ambaye ulimwengu hauwezi kumpokea, kwa kuwa haumwoni wala haumtambui; bali ninyi mnamtambua, maana anakaa kwenu, naye atakuwa ndani yenu—**Yohana 14:16, 17.**

Yesu alikuwa amekaribia kurudi nyumbani Kwake katika nyua za mbinguni, lakini aliwahakikishia wanafunzi Wake kwamba angewaitea Msaidizi, ambaye atakaa pamoja nao daima. Kwa uongozi wa Msaidizi huyu wote wangeamini kikamilifu. Yeye ni Roho wa ukweli, lakini ukweli huu ulimwengu hauwezi kuuona wala kuupokea....

Kristo alitamani wanafunzi Wake waelewe kwamba hangewaacha wakiwa yatima. Alitangaza “Sitawaacha ninyi yatima; naja kwenu” (Yohana 14:18, 19).... Uhakikisho wa thamani, wa utukufu wa uzima wa milele! Ingawa hatakuwepo, uhusiano wao Kwake ulikuwa wa mtoto kwa mzazi wake....

Maneno yaliyosemwa kwa wanafunzi hutujia sisi kupitia maneno yao. Mfariji ni wetu kama alivyokuwa wao, nyakati zote na kila mahali, katika huzuni na mateso yote, wakati mambo yanapoonekana kuwa giza na mambo yajayo kututatiza na tunapohisi kushindwa na kuwa wapweke. Hizi ni nyakati ambapo Mfariji atatumwa katika kujibu ombi la imani.

Hakuna Mfariji kama Kristo, aliye mwema na wa kweli. Anaguswa na hisia za mapungufu yetu. Roho Wake ananena moyoni. Hali ya mambo inaweza kututenga na rafiki zetu; bahari pana isiyotulia inaweza ikainua mawimbi kati yetu na wao. Ijapokuwa urafiki wao wa kweli unaweza ukawa bado unadumu, wanaweza kushindwa kuuonesha kwa kutufanyia kile ambacho kingepokelewa kwa shukrani nyingi. Lakini hakuna hali ya mambo, wala umbali ambao unaweza kututenga mbali na Mfariji wa mbinguni. Popote pale tulipo, popote tutakapokwenda, yupo pale daima, yule aliyetolewa kwa niaba ya Kristo, ili kufanya kazi badala Yake. Yu mkono wetu wa kuume daima, ili kuzungumza maneno yenye kufariji, yaliyo mema, ili kututia moyo, kutuwezesha, kutushikilia na kutuchangamsha. Mguso wa Roho Mtakatifu ni maisha ya Yesu ndani ya nafsi. Roho Mtakatifu hufanya kazi katika na kwa kila mtu anayempokea Yesu. Wale walio na uzoefu wa ukaaji wa Roho huyu hudhihirisha tunda lake—upendo, furaha, amani, uvumilivu, utu wema, fadhili na imani.